

四庫全書

史部

欽定四庫全書

平定準噶爾方略正編卷七十九

乾隆二十四年九月庚午

諭按察使銜納世通豫籌擒賊撤兵事宜

上諭軍機大臣曰納世通領兵四百名會同永貴努
三追捕戕害德舒之嗎哈沁等諒可立就擒獲著
傳諭納世通如勦賊事竣所領兵丁或遣回阿克
蘇或留駐庫車皆可倘二城俱可不需則查明此

內有西安滿洲兵即撤回本處有綠旗兵即發往
定長處屯田俱著酌量辦理

諭辦理屯田副都統定長等解送軍營馬匹及追回
庫車兵丁

上諭軍機大臣曰定長等奏烏魯木齊所易哈薩克
馬一千餘匹於八月二十四日由昂吉爾圖淖爾
起程從伊拉克送至庫車轉送富德等語此項
馬匹原備來年進兵之用今富德在拔達克山交

界若徑行解送未能妥協著傳諭定長等將馬匹
加意牧放不必遠尋富德即從庫車送往葉爾羌
備用再定長奏德文調兵一百名至庫車防範嗎
哈沁昨據德文奏報朕以納世通領兵四百已足
敷用業已傳諭申飭仍著定長將派往之兵差人

追回

辛未

定邊將軍兆惠等疏奏拔達克山信息

兆惠等奏言逆賊波羅泥都霍集占等逃入拔達克山久無確信臣等遣侍衛等飛騎赴富德處探信八月三十日三等侍衛塔尼布回報本月十九日抵阿勒楚爾軍營二十三日有遣往拔達克山之厄魯特薩穆坦同來使至營據稱波羅泥都兄弟俱被伊部落拏獲霍集占受鳥鎗傷三處甚重僅存餘息我等起程二日有人追來告稱霍集占已死理合將波羅泥都送來

但我等摩羅及阿琿等據經文無將同類獻與他國之理懇求寬免等語副將軍等復嚴飭來使務將波羅泥都俘獻霍集占雖死亦必獻尸否即進兵臣等伏思拔達克山非妄生事端之部落今既拏獲逆賊自必俘送但即行送出恐其屬下譏議故稍作推托之詞大兵若前進相逼則其獻尤速臣等即行知總兵官五福趕解糧餉令提督董孟等辦糧接濟并選牧養馬數

百匹遣副都統豐訥亨送往軍營一面候齊凌
扎卜等押送新降回衆前來分別安插解送即
前駐英噶薩爾相機辦理奏入

上諭軍機大臣曰兆惠奏稱差往探信之侍衛等回
報逆賊波羅泥都霍集占俱為拔達克山人俘獲
等語看來二賊被擒情事屬實雖未據富德奏報
計此時正在促令縛獻如罪人斯得則大功告成
富德仍遵前旨同兆惠來京即明瑞阿里衮已祿

由屯溫布等叅贊領隊大臣并年久侍衛等亦應
分起陸續回京所有兵丁除去年更換者仍留駐
防外餘俱酌量撤回不過留舒赫德一人在葉爾
羌辦事足矣若二賊之被擒與死雖實而拔達克
山仍未呈獻則不可中止必當示以軍威即今年
不能來年亦必進兵總以必得為期倘二賊被獲
情事不實或別有他故則愈不可中止今且暫息
馬力於來年選兵數千名直入其境搜捕二賊即

將拔達克山部落一併辦理亦無不可著傳諭兆惠富德等知之又

諭曰兆惠等奏齊凌扎卜伯克鄂對等解送新降回人萬餘口約數日內即到解到時查明由喀什噶爾送信逆賊之回人酌量辦理又阿卜都喇伊木墨墨氏敏情俱可疑俟喀什噶爾輪班入覲時將此二人作為頭起送京等語昨富德奏稱齊凌扎卜等所解人口內塔里雅沁回人伯克特穆爾呼

雅吉特兩戶脫逃朕已密諭兆惠等將久從逆賊
之回人相機辦理至送信賊人之語出自俘獲人
口所供未可遽信即阿卜都喇伊木等與賊交通
亦嚮導回人所稟保無挾嫌誣害若將此二人解
京其餘人衆必生疑懼當候齊凌扎卜等到時密
查逆賊親信之人令其指實如二人果與賊通即
正法示衆或仍有他人亦另行查辦

申諭定邊將軍兆惠等籌辦降回事宜

上諭軍機大臣曰兆惠等將降回額爾克和卓額色尹鄂托蘭珠和卓瑪穆特解送來京未免辦事過急從前兆惠等奏請將二人送京朕即謂留伊等在京恐霍集斯等妄生疑懼俟擒獲霍集占時再行分別辦理今既將額色伊等送來雖留住京師其作何安插之處尚未酌定仍著傳諭兆惠等現在新降回衆或尚有霍集占族戚在內若逆賊已獲即行送京否則仍當酌量情形勿使回衆疑懼

致生事端其作何辦理即詳悉妥議速奏

癸酉

賜索倫總管錫通阿巴圖魯號

上諭軍機大臣曰索倫總管錫通阿因軍前得傷撤
回殊可軫念著加恩賜號丹拜巴圖魯賞銀一百
兩同來病廢兵丁俱著遣回游牧其臨陣得傷者
仍著查奏

命乾清門侍衛薩穆坦等隨辦哈薩克貿易事務

上諭軍機大臣曰努三久在軍營効力俟辦理嗎哈沁事竣即起程回京哈薩克貿易事務交永德辦理永德辦事二年頗稱諳練著派乾清門侍衛薩穆坦侍衛倭昇額馳驛前往烏魯木齊隨永德學習行走

命原任巡撫圖爾炳阿辦理庫車事務

上諭軍機大臣曰現在北路軍營無事著圖爾炳阿前往庫車同納世通辦理事務

甲戌

命叅贊大臣阿里衮留葉爾羌辦事

上諭軍機大臣曰昨諭平定回部後將軍大臣等回京留舒赫德在葉爾羌辦事今思葉爾羌等處地方遼濶舒赫德一人恐難兼管著留阿里衮同辦事務可因便傳諭伊等知之

命額爾克和卓額色尹等在京居住

上諭軍機大臣曰頃詢問兆惠送來之額爾克和卓

額色尹鄂托蘭珠和卓瑪穆特等據稱伊等原住葉爾羌喀什噶爾為策妄阿喇布坦掠往吐魯番後居伊犁又為霍集占所掠逃往塔什罕等語額色尹係霍集占一族且久住伊犁不便遣回葉爾羌等處應即留京居住除兆惠所奏現在送京之圖爾都和卓外仍將伊等家口送京其瑪穆特之子巴巴和卓兆惠等回京時亦即同來回衆中尚有似此者俱酌量辦理

諭定邊將軍兆惠等查明拉達克汪所報葉爾羌逃
衆

上諭軍機大臣曰據官保奏拉達克汗報稱從前遣
往葉爾羌探信之人未回又遣組克吉等前往距
葉爾羌七日之程遇千餘人詢係葉爾羌所屬因
避大兵逃出不肯放行并搶奪衣服等語著傳諭
兆惠等查明此等人衆確係何處逃來今欲何往
或係葉爾羌屬人於何時逃避大兵是否有心與

霍集占不合據實奏聞

諭駐藏副都統官保等停止拉達克人偵探賊信

上諭軍機大臣曰據官保等奏拉達克汗請轉奏謝

恩并報明探信人等未能前去朕已具悉昨因葉

爾羌等處歸附仍降旨曉諭令將軍等奏報霍集

占等逃入拔達克山被伊部落人等擒獲俟其獻

出時再行降旨嗣後拉達克汗處不必遣人探信

著官保等傳諭知之仍賜拉達克汗緞二端

密諭定邊將軍兆惠等停止回人世襲

上諭軍機大臣曰回城現俱平定應將霍集占等私
行征歛之項嚴行禁止即辦事之阿奇木等員亦
應如各省大臣之例遇缺補授或緣事革退則開
缺另補至於霍集占族戚等所以留住京師并令
伯克霍集斯等俟撤兵時同來者因恐伊等若仍
居舊地必妄生希冀致起釁端此正所以保全之
也兆惠等此時宜曲加撫慰不可稍有漏洩俟霍

集斯到京後即曉諭各城回人以中外一家惟知
共主阿奇木伯克不過辦事大員毋許自稱諾顏
私收貢賦即阿奇木等缺出亦揀選賢員或以伊
沙噶陞補不准世襲章程既定則伊等希冀之念
自消庶地方可以寧謐著因便密諭兆惠舒赫德
遵照辦理

諭叅贊大臣舒赫德等酌辦和闐戶口事宜

上諭軍機大臣曰福祿等奏詳查和闐六城回人共

一萬三千一百四十三戶四萬一千二百八十六口較齊凌扎卜等原查數目缺五千四百五十七戶三萬一千二百五十七口等語齊凌扎卜等原查數目本未確實而後來被圍數月或不免傷損抑係回人等圖貢賦輕減隱匿脫漏亦未可定今若有人肯告自不便顛預否則不必究問著傳諭舒赫德等此時且以停止查辦為安若日後自行敗露亦無難再辦也

叅贊大臣舒赫德疏奏安插多倫等處回衆

舒赫德奏言新授多倫阿奇木伯克阿卜都賚
率小伯克等來見臣以奏准庫爾勒等處游牧
曉示阿卜都賚云我故兄托克托游牧即在此
處聞得散往羅卜淖爾舊屬亦有復回者乘此
時伐木造屋以備春耕但多倫回衆內有數百
人無食者請為料理臣示以樽節今將此等無
食之人暫於阿克蘇留養俟安插後再來收取

并將現在回人一千餘戶五千三百餘口及馬
駝牛羊各數行知書山外伊等來春耕作籽種不
敷請照本年庫車回人例由官借給秋收後加
倍償還又喀什噶爾葉爾羌等處陸續投來
之阿克蘇賽里木回人一千二百餘戶俱遣回
本處安插奏入報

聞

丙子

諭定邊將軍兆惠等酌辦烏沙克等回衆及送馬事

宜

上諭軍機大臣曰兆惠等奏齊凌扎卜解到降回一萬餘口請將伊等分別辦理再往英噶薩爾等語前諭回衆送到時烏沙克伯德爾格塔里雅沁等回人必須辦理者特為二賊未獲留之恐滋事端今既有擒獲之信伊等即懷叵測亦已絕望又何必多行殺戮兆惠等務宜體察情形若安插伊等

尚可不致生事即將伊等同家口移於安西等處
歸併綠旗兵或不便內移及恐沿途脫逃生事又
或二賊之信未確來年仍須進兵兆惠等仍遵前
旨酌量辦理其二賊離異之妻室等者解送來京
餘人暫安插於吐魯番候旨定奪又

諭曰兆惠所奏籌辦馬匹一事今復辦馬一萬匹送
往葉爾羌俟逆賊等獻出與否再為酌量行止此
時信息尚未確實兆惠等其相機妥辦

諭刑部侍郎永貴等酌量留遣索倫兵丁

上諭軍機大臣曰兆惠聞德舒被害之信令副都統
銜阿定保領索倫兵五百名前赴永貴處聽候協
勦前因永貴領兵追勦嗎哈沁曾諭努三會勦不
知曾合隊否計永貴應已獲賊竣事此等索倫兵
既在軍前年久而拔達克山又將逆賊等獻出即
可撤回游牧如信息未確則就近暫住庫車以候
調遣

議休息喀爾喀部落事宜

定邊左副將軍成衮扎布等奏言查喀爾喀四部落從前災傷盜竊以致失業荷蒙

聖主賑貸頻施但積歉之餘尚多拮据臣伏查乾隆十八年起有交喀爾喀等牧放之馬駝羊隻除軍需應用及寬免倒斃外尚有應賠之馬一萬五千六百一十六匹駝五千二百八十三隻乳牛五千九百七隻羊二萬六千六百三十二隻

又二十年進兵及擒青滾雜卜仍有應賠之馬
三千六百七十匹有奇駝七百隻有奇此時西
三部落將二十一年盜竊各牲畜並貸賠車臣
汗部落之項雖經賠補尚未足數仰懇

聖恩將應行催交各牲畜寬限二三年似於蒙古等
生計有裨又查軍營更替之侍衛官員等以公
事往來各部落應付馬匹蒙古等多有藏匿遺
失今公務漸少臺馬足用請將侍衛官員等停

其供給專由臺站辦理即有來往各旗差使亦
遵限制庶蒙古等得各謀生理久自充裕至布
延圖之兵從前奉有暫行駐劄之

旨現在各部落互相推諉請飭交副將軍盟長及烏
梁海等令其照例均管庶不致偏枯奏入得

旨軍機大臣議奏尋議哈爾哈應賠馬匹俱經屢次
展限自不便再為延緩但年來哈爾哈等委屬
拮据應請交與成衮扎布令其定限具奏至北路

軍營事件無多臺站馬匹亦足嗣後侍衛官員等應請停止派取蒙古馬匹概從臺站辦理至差往各部落人等其應付馬匹原有官品定額或奉行日久私自多索亦未可定應再行申禁有額外騷擾蒙古者即告知該扎薩克詳報將軍查叅又所奏布延圖軍營請飭各部落均辦查布延圖駐兵現在無事自應裁撤但副將軍策布登扎布尚在伊犁堵截逃賊請俟事竣

之日即行撤回臣等更請申飭該扎薩克等宜
仰體

皇仁約束所部勿為逃盜有犯必懲毋事姑息則良
善得以安居而生計漸臻饒裕矣奏入

上從之

丁丑

定邊右副將軍富德等疏奏拔達克山遣使情
形

富德等奏言臣等遣往拔達克山之厄魯特侍衛薩穆坦及回人伯克素勒坦和卓等同拔達克山汗素勒坦沙來使鄂穆爾拜到營據薩穆坦等告稱七月十八日自巴沙楚爾起程二十六日抵素勒坦沙所居次日素勒坦沙遣人來迎相見後告以逆賊霍集占受

大皇帝深恩得回故土乃反覆叛逆戕害大臣今歲大兵進勦伊等望風逃竄我兵若深入爾地久

已擒獲因不忍以逆賊之故驚擾無罪部落是以遣使曉示爾當速為擒獻素勒坦沙云我並不知霍集占等罪惡如此遂令霍集占遣來之鄂斯瑞雅斯布庫里相見薩穆坦以言折辯不能回答二十八日素勒坦沙邀霍集占弟兄入城波羅泥都即入霍集占率餘衆於城外揚言云若將來使交出情願為爾奴僕素勒坦沙不允霍集占即搶掠村庄素勒坦沙遂將波羅泥

都拘執領兵數千人圍困霍集占所據山岡霍
集占胸背胛骨三處受傷旋被擒獲拉木呼里
巴爾巴呼里被殺鄂斯瑞雅斯布庫里亦俱受
傷薩穆坦等勸令縛獻素勒坦沙商之衆頭目
及阿琿摩羅數人俱稱戎等經典內凡派罕帕
爾子孫除戰爭外不許拏送與人恐他處阿琿
摩羅及外部聞而生事大國救援不及今霍集
占受傷將死祈稟明將軍等語即將霍集占兄

弟拘禁並聞有送往布哈爾之語薩穆坦起程
二日拔達克山遣人追來告稱霍集占傷重身
死臣等將素勒坦沙來書譯看與薩穆坦等所
告相同隨於二十五日會集大臣侍衛官員令
來使鄂穆爾拜進見所告如前并稱進獻馬匹
臣等再三曉示仍面斥來使云汝等口稱降附
若不擒獻逆賊即屬獲罪況霍集占等統衆數
萬原欲據爾土地幸大兵勦殺殆盡爾等始得

安生我大兵尚不肯輕入爾境恐有騷擾爾等
既得保全又倖掠獲乃不擒獻逆賊我等即行
進兵矣鄂穆爾拜懇告云俟傳知素勒坦沙再
行定奪即賞茶遣出是日薄暮鄂穆爾拜再求
進見述及擒獲霍集占等時阿璉摩羅俱各哭
泣素勒坦沙原欲呈送因伊等有欲將房屋焚
毀前往默克以爾罪傳知各部之語是以中止
將軍大人再差人前往素勒坦沙自不敢違臣

等問其送往布哈爾之事據稱雖傳言送往但
既與結仇必不能行惟離拔達克山二日程途
有一監禁罪人之地或送彼看守等語臣等隨
給以諭素勒坦沙之書併賞來使銀兩緞足限
期二十五日如過期不至即行進兵然必將生
者縛送死者呈驗將首級解送方可於二十六
日清晨仍同薩穆坦等起程一面密令額爾登
額伍岱成果領兵三十名會同薩穆坦行走復

令伊柱巴圖濟爾噶爾霍集斯領兵前往瓦罕
附近處所臣等亦移兵續進并據瓦罕伯克密
爾莽蘇爾遣伊子蘇爾坦具呈願以所管千餘
戶歸降俱撫慰遣回奏入

上諭軍機大臣曰富德等奏稱伊遣往拔達克山之
侍衛等回報逆賊波羅泥都兄弟俱被素勒坦沙
擒獲霍集占受傷身死因回人經典不便呈獻富
德仍致書嚴索約日起程等語看來富德從前若

直前追勦久經俘獲乃坐失機會朕深為追悔不
知富德等亦知愧悔否若非伊等前此曾經効力
朕必重治其罪今既遣人再索因勅諭素勒坦沙
并賞伊綴足由臺站發往將來二賊如仍未獻出
則來年進兵斷不可已必以獲賊為竣事此次厄
魯特侍衛薩穆坦等行走甚屬奮勉薩穆坦著加
恩授為二等侍衛素勒坦和卓額勒木布爾額色
木俱賞戴孔雀翎授為三等侍衛敦多卜既經獎

賞藍翎即授為藍翎侍衛其隨去回人等著富德酌量賞給以示鼓勵

賜拔達克山素勒坦沙

勅書

奉

天承運

皇帝勅諭拔達克山汗素勒坦沙據將軍富德等奏爾奉將軍檄文擒拏逆賊霍集占波羅泥都具見

恭順聞霍集占受傷身故波羅泥都現在拘禁爾
復遣鄂穆爾拜同侍衛等前來以爾等經典擒獲
沁噶木巴爾子孫不便呈獻致別部落興戎將軍
大臣等以霍集占等罪惡再行曉示若不呈獻即
日進兵朕為天下共主內外一體咸加撫育況爾
慕化歸誠深用嘉悅惟是霍集占兄弟前為準噶
爾拘禁因大兵平定伊犁釋其囚繫俾居故地自
應感激圖報乃負恩背義反將所遣大臣官兵盡

行戕害是以興師問罪復敢聚黨抗命肆虐無
辜強奪婦女與爾等經教大相背戾衆怨沸騰今
年大兵進勦葉爾羌喀什噶爾等城咸思歸附二賊
恐被縛獻先率其黨與跳身遠遁然逆徒數萬直
抵拔達克山雖不敢抗我軍威實足據爾土地我
大兵撫定各城即行追襲勦殺無算乞降者萬餘
人僅存餘孽以入爾境將軍大臣等非不能窮追
直入實體朕好生之心不忍擾害無罪部落朕亦

屢諭將軍等暫停師旅故逆賊等未即就擒今爾
乃以阿琿摩羅離心及別部落啟釁為詞此等情
事縱實尚屬未然今大兵壓境即暫時休息來年
必兵馬雲集斯時又誰能相助此中利害之重輕
自宜熟計至我大國兵力爾等當亦聞知即平定
準噶爾由於傳說若收服葉爾羌喀什噶爾逆賊
數萬衆望風奔竄乃爾等目覩者爾素勒坦沙宜
中有定見勿惑人言將霍集占之尸與波羅泥都

欽定四庫全書

平定回疆方略卷七十九

送至軍前朕必厚加恩賞但爾如果已勸擒霍集
占等又何惜而不獻其為爾部落留養飾詞以對
情節顯然此等語將軍大臣尚不受爾欺矧敢於
朕前支飾耶此時惟悔悟縛獻則前事皆可不論
今因降勅賜爾蟒緞色緞各二端爾其深思熟計
以享無窮之福特諭

以索取逆賊霍集占等

宣諭中外

上諭大學士曰將軍兆惠富德等先後奏報大兵追
勦逆賊霍集占波羅泥都抵拔達克山界其部長
素勒坦沙告稱遵將軍大人諭邀擊二賊現已鎗
斃霍集占生擒波羅泥都所差侍衛薩穆坦俱經
目覩但回部信奉經典從無自擒族類轉送與人
之例若竟呈獻天朝恐別部落必來滋事是以求
免等語已傳諭兆惠富德等令即尅期勒兵向索
且曉譬順逆以該部落既知歸誠內屬理應獻賊

自効即以回部舊俗不自相戕為詞則己不應有
生擒鎗斃之舉況慮他日諸部之滋事較此時天
朝大兵之壓境其利害尤為明白易曉如果該部
落即日遵諭獻出則膚功自可告竣而庸懦無識
之徒或以諸城悉定各部款降似此斃斃逋賊何
必更事窮追致滋勞費殊不知用兵回部原非朕
之本意當伊犁平定準噶爾悉入版圖而東西布
魯特左右哈薩克等無不傾心向化何有於花門

雜種而必欲為窮兵黷武之事實以逆賊兄弟負
恩反噬不得明正其罪以彰撻伐今葉爾羌喀
什噶爾均就撫綏設官定賦其於回部大局固已
全定獨逆賊兄弟尚未懸首藁街此皆從前雅爾
哈善玩寇僨事於攻圍庫車時使已投羅網之逆
孽復得遠颺蹉跎輾轉以至今日實為此事罪魁
自兆惠富德統兵以來掃其巢穴分路進勦屢獲
全勝獨惜富德等兵至伊西洱庫爾淖爾其時逆

賊疲憊已甚即謂我軍馬力稍乏但乘勢精選數
百騎緊躡其後即可直抵拔達克山協同捕獲何
至該部落得以藉口此亦因富德等俘獲衆多其
氣不無稍懈而明瑞在京時朕曾諭以臨陣須當
慎重遂致誤會未免少為徘徊耳然此時大軍方
駐彼地不過賈其餘勇即可集事又何所增其勞
費若意在苟且遷就遽欲貢諛稱賀謂可息事寧
人則朕斷斷不為也如前此阿睦爾撒納已伏冥

誅並遣大臣驗實因逆尸究未獻出朕即不肯告廟受賀以為自欺欺人之計此內外諸臣所共知者況堂堂大清兵力全盛而回部之賦稅屯田之收穫以及沿途貿易城倉積貯儲需充裕不獨內地毫無飛輓饋運之勞而陝甘兩省蠲賑之恩有加無已閭閻初不知有軍興徵發豈漢唐宋明諸代疲中國之財力而不能得地尺寸者可比今統計用兵不越五年而西陲萬餘里城無不下衆無不降

此實仰荷

上蒼福佑得以奏茲偉績而人事之因時順應尤不可不善以承之也我滿洲風尚素稱淳樸勇往而承平日久八旗子弟多耽安逸偶遇軍旅之事轉致不能嫻習朕於此舉正欲訓誨督率之俾習勤勞而諳韜畧而諸臣中或猶有狃於小利近功不知事機之緩急者古者無事之時不廢訓戎講武今以法無可追之逆酋當功有必成之事會且可藉

以練我殺敵致果之將材又何所顧慮而竟為浮
論所惑急圖完局貽笑方來也不然則佳兵之誠
朕念之熟矣豈尚存好大喜功之見以耀兵威而
勤遠略耶著將此宣諭中外知之

諭定邊將軍兆惠等仍駐葉爾羌

上諭軍機大臣曰朕勅諭拔達克山素勒坦沙令將
逆賊等擒獻倘稍有欺飾延緩則來年尚須進兵
兆惠不必往英噶薩爾仍駐兵葉爾羌查辦新降

回衆

諭辦理屯田副都統定長等體卹催運商駝

上諭軍機大臣曰同德奏准定長咨稱從巴里坤運
籽種等項駝隻已轉催運往烏魯木齊歸途又轉
運軍營衣物不必送回原處等語此等運往開展
駝隻皆係官催商駝若節次轉運則商民畏難不
前勢必更煩官辦且致貽誤即使偶從轉催亦必
視其情願與否不可勉強從事著傳諭定長同德

知之

諭陝甘總督楊應琚等辦送馬匹事宜

上諭軍機大臣曰同德奏稱已里坤所有馬匹擇其
臙壯者五千匹在北山前坡牧放俟至十月收槽
之時加意餵養等語此項馬匹特為軍營需用已
派清馥同乾清門侍衛等由去年阿里衮送馬之
路緩行送往同德應即預備分起陸續起程即如
阿里衮所送之馬於十月間由庫車一路前進地

氣和暖水草不乏是以應用無悞若此時不行預
備待至春來必不能及且轉不若額林哈畢爾噶
之徑捷矣同德竟不知事體緩急漫以收槽餽養
為言著傳諭揚應琚清馥五吉同德等遵照屢降
諭旨辦理併傳諭舒常等亦作速前往會同行走

平定準噶爾方略正編卷七十九

欽定四庫全書

平定準噶爾方略正編卷八十

乾隆二十四年冬十月朔戊寅

恩諭緩徵陝西歉收各屬新舊錢糧

上諭大學士曰陝省西安各府屬之咸陽等十州縣
今夏得雨稍遲收成歉薄雖於例並不成災而民
力不無竭蹶所有懷遠清澗米脂吳堡四縣本年
應徵未完地丁錢糧草束及帶徵舊欠常平社倉

穀石籽種等項俱著加恩緩至明年秋成後徵收
咸陽醴泉同官韓城商州雒南六州縣新舊民欠
錢糧倉穀緩至明年麥熟後徵收以紓民力其沿
邊之膚施靖邊保安塞延長甘泉綏德七州縣
所有上年緩徵新舊錢糧倉穀例應本年徵收但
該處連年收成未能豐稔應加意撫綏以資休養
著再加恩將該州縣除本年照例徵收外其帶徵
之錢糧倉穀再緩一年於明年麥熟秋成後分別

帶徵示朕優加體恤之意該部遵諭速行

諭內閣學士清馥等管解軍營馬匹

上諭軍機大臣曰據楊應琚奏稱揀選軍營馬一萬匹陸續解交清馥轉送軍營等語從來楊應琚奏送頭起馬匹之時即諭清馥如尚未回抵巴里坤著五吉舒常等一同解送今此項馬匹已全數抵巴里坤著遵照前旨加意護送務期妥協濟用

陝甘總督楊應琚疏奏辦給回人棉種

楊應琚奏庫車等處回人人素習耕織從前服屬準噶爾歲納布疋後因荒亂相仍將棉子俱已食盡臣思布疋為民生日用之物將來伊犁駐防通商貿易正資調劑查陝省西安同州兩府俱有產棉之地每畝種子十觔可收淨花二十餘觔棉子一百二十餘觔請先以二十畝計算將棉子二百觔遇便解至庫車散給回人俾及時佈種來年即以所得分散各城二三年後

可望種植日廣不獨回人衣被無窮即屯駐官兵亦得就近購買奏入報

聞

乙卯

命頒給阿克蘇大臣關防及葉爾羌奏匣

上諭軍機大臣曰舒赫德奏伊前往葉爾羌辦事將欽差大臣關防帶往其阿克蘇應請給以關防至葉爾羌距內地甚遠奏報事件宜加慎重請給賞

奏匣等語阿克蘇為回城要地已派阿桂駐劄辦事著該部賫送欽差大臣關防一顆以昭信守其賞給葉爾羌奏匣亦照所請行

授回人額色尹等爵秩有差

上諭軍機大臣曰回人額爾克和卓額色尹鄂托蘭珠和卓瑪穆特俱係派噶木巴爾後裔著加恩封額色尹公爵授瑪穆特為札薩克頭等台吉護送伊等前來之獎賞藍翎克什克巴圖魯烏克什勒

圖著授為藍翎侍衛與藍翎侍衛額勒濟圖俱賞銀五十兩

庚辰

命御前侍衛署副都統安泰護送軍營馬匹

上諭軍機大臣曰護送軍營馬匹已派侍衛舒常蘇勒仍令清馥同往若清馥未回巴里坤則五吉在哈密會同行走但此次馬匹為數無多護送之員尚少此時安泰承審叅案應已竣事著與伊等會

合送至葉爾羌軍營

命嚴懲疎脫嗎哈沁之官兵等

上諭軍機大臣曰據清馥奏稱遣往搜捕嗎哈沁之都司張遇奇察哈爾驍騎校阿喇卜坦已於喀喇莽鼐探得賊蹤並未親行追襲但遣馬甲富海索倫馬甲噶勒保領兵八名前往伊等遇賊又未報知及張遇奇等聞信往追見有男婦四十餘人反被賊誑誘借給馬匹以致逃去請將張遇奇阿喇

卜坦交部嚴加議處富海噶勒保重責百鞭等語
清馥係領兵追賊之人既未親身前往又不將疎
懈官兵從重辦理更屬姑息著傳旨申飭至追剿
賊人若非勇往直前則將來效尤成習各顧身命
安望擒獲張遇奇阿喇卜坦俱著革職留軍營効
力贖罪富海噶勒保著即正法示衆

辛巳

諭刑部侍郎永貴等奮勉搜捕嗎哈沁

上諭軍機大臣曰據永貴奏稱搜捕嗎哈沁等至阿勒坦和碩山嶺雖有賊蹤計逃去已十餘日雪盛不能前進請俟來春選兵千餘名前往追襲等語初閱永貴等請罪之詞意謂又生一事及覽竟方知為山嶺雪盛撤兵暫回耳伊從前聞德舒被害即請追賊復仇頗為勇往今半途而返甚屬無謂若謂雪大難行嗎哈沁等又豈能飛越耶伊等馬力稍乏亦事之所有但必待來年且將貽人嘲笑

况朕所諭來年大兵凱旋仍嚴搜逸賊並非指此等戕害德舒之賊亟應誅戮以紓衆憤者當此初冬雪積未厚尚可前行賊若越嶺必藏匿烏魯木齊額林哈畢爾噶等處自無庸於庫車等處搜索此時永貴應與努三會合既有善於嚮導之人且賊衆見久無追兵未免弛懈猝然相遇勢可擒獲著傳諭永貴即於阿克蘇兵內選精銳者三百名帶至烏魯木齊現在解送軍營馬千餘匹若途中

相遇即每人選給三匹餘者仍送行在是馬匹既足而存貯糧石又可接濟務期盡勦賊衆為德舒復仇辦理既竣即同努三來京著納世通留庫車辦事

壬午

申飭搜捕嗎哈沁不力之內閣學士清馥

上諭軍機大臣曰清馥奏稱詢問厄魯特嚮導鄂齊爾知喀喇莽鼐諾顏鄂博之西地名額什頗饒水

草間有嗎哈沁賊人斗齊等在彼藏匿因派兵四十名委索倫營總濟彥保等前往追捕伊領兵三十名由拜塔克之北尋覓賊蹤策應濟彥保等語昨因清馥並未親身追賊而辦理官兵又復姑息業經傳旨申飭伊一聞官兵疎脫賊人之信即當迅往追襲乃視若尋常仍委之濟彥保等甚屬怯懦不堪從前伊在巴里坤辦事意其尚可造就不謂一經追賊即畏縮如此本應即行治罪姑從寬

免伊雖奉到解送馬匹之旨諒亦未能趲赴著不
必前往惟專辦勦滅嗎哈沁若仍前玩忽以致賊
人逃脫朕必重治其罪伊若指稱辦送馬匹遂爾
轉回即係自取罪戾併傳諭五吉安泰將應送馬
匹徑行承辦不必候清馥信息

乙酉

定邊左副將軍成袞扎布等疏奏遷移烏梁海
游牧

成衮扎布奏言臣等前奏據烏梁海內大臣察達克等因現在游牧之科卜多等處不產貂鼠請將伊等游牧展至阿爾台額爾齊斯等處經軍機大臣議覆以額爾齊斯等處若係都爾伯特舊游牧應請

旨傳諭索羅木衮布策凌烏巴什如伊等情願前往即可遷移將現駐之烏蘭古木即賞給察達克等或不願再遷則額爾齊斯等處與其閒曠何

如給與烏梁海等居住臣等遵

旨遣副管旗章京莫尼扎卜前往都爾伯特游牧曉
示據親王策凌烏巴什等告稱察達克所請游
牧係烏梁海舊地與我等游牧隔遠今烏蘭古
木地畝甚肥羊隻孳生亦盛久住可以饒足情
願仍前居住不行遷移等語臣等伏思都爾伯
特部落既不願遷移請照察達克等所指自博
爾集奇蘭一帶展至阿爾台山陽令其約束所

部游牧可也奏入

上從之

丁亥

諭定邊將軍兆惠等辦理降回各事宜

上諭軍機大臣曰據兆惠等奏稱齊凌扎卜鄂對阿什默特送到降回二千六百餘戶八千三百餘口大半係伯德爾格塔里雅沁之人擬於此內酌量人數多寡分派大小頭目遞相約束移至吐魯番

庫爾勒哈喇沙爾托克三等處安插俟起程後兆
惠即前往英噶薩爾又密奏阿什默特與伯克霍
集斯交好因加保薦又近日查給阿什默特之回
人百餘名口多擇富厚之家非盡係伊舊屬即霍
集斯於補授葉爾羌頭目亦受餽送等語來降回
人等除係霍集占逼脅同行外其烏沙克塔里雅
沁伯德爾格回人均不可信已屢諭兆惠等相機
辦理至阿什默特既與霍集斯交好俟軍務告竣

即派令來京此外有附和霍集斯之人俱如此辦理此時尚宜慎密即有告發之人亦仍行安慰今逆酋等尚未授首兆惠不必往英噶薩爾仍駐劄葉爾羌辦事候富德等信息

諭護軍統領努三等追剿嗎哈沁事宜

上諭軍機大臣曰努三等奏稱准清馥咨文隨派出察哈爾佐領裕木扎卜厄魯特嚮導蒙克津等領兵往喀喇莽鼐等處搜捕等語此等嗎哈沁誑誘

官兵馬匹情罪可惡務必盡行勦滅著傳諭努三等此等賊人即窘迫來降仍應解送肅州正法伊從前所得降人如蒙克津等之奮勉効力則令其來京在上駟院行走其餘即賞給王大臣等不必安插舊地昨諭努三與永貴會合追勦戕害德舒之嗎哈沁等著遵旨奮勉辦理

護軍統領努三等疏奏擒獲嗎哈沁及屯田收穫分數

努三等奏言九月初十日派厄魯特藍翎侍衛
巴桑等巡查昌吉羅克倫等處搜捕嗎哈沁據
索倫領催署驍騎校噶滿泰等擒獲厄魯特巴
彥夫婦及巴圖孟克等前來除巴圖孟克曾隨
噶爾藏多爾濟入

覲人頗誠實留充嚮導其餘人俱行正法至前次擒
獲之訥克衣續奉

諭旨烏魯木齊正法查訥克衣已於九月初四日

解京應請在京辦理又蒙

恩諭令臣努三兼辦屯田事務查烏魯木齊新舊屯
田兵一千名舊兵除差遣外實屯田兵六百七
十四名種地一萬五千一百餘畝收麥黍一萬
二千二百四十餘石新兵二百名種地一千五
百餘畝收麥黍二千二百四十餘石舊兵所種
較上年加倍其收穫亦如之管理屯田之遊擊
金梁頗屬妥協謹將大槩先行查奏奏入報

聞

諭定邊將軍兆惠等酌量頒給拔達克山

勅諭

上諭軍機大臣曰前因索取逆賊霍集占等曾勅諭
拔達克山頭目素勒坦沙今思伊部落若深明利
害應已呈獻渠魁故再降勅諭如拔達克山有呈
獻之信即以此勅往諭或尚在游牧仍將前勅頒

發

賜拔達克山素勒坦沙

勅書

奉

天承運

皇帝勅諭拔達克山素勒坦沙據將軍富德等奏稱
爾遵將軍大臣等傳檄攻圍逆賊霍集占波羅泥
都俱經擒獲具見爾願為臣僕之心聞霍集占受
傷身死波羅泥都尚在拘禁爾等以所奉經教不

欲將派噶木巴爾後裔呈獻是以躊躇未決遣使
前來軍營將軍大臣等復以逆賊等悖逆暴虐蔑
棄經教大兵進剿降者接踵僅存餘孽竄入兩境
我師惟恐騷擾尚行遠駐惟以游騎向爾約期索
取若踰時不至即進兵搜捕詳加曉示節次奏報
朕為天下共主內外一體俱加撫恤爾素勒坦沙
慕思仁化朕已洞悉至霍集占等負恩背叛種種
奸惡爾亦聞知將軍大臣再三遣使特體朕招攜

懷遠之至意其務將霍集占兄弟俘馘以獻今因
頒勅賜爾蟒緞四端俟逆賊等送到時朕必沛殊
恩以酬誠悃爾其深思遠慮永荷無疆之福特諭
諭定邊將軍兆惠等策應富德事宜

上諭軍機大臣曰前諭追索逆賊霍集占等若今年
不能竣事兆惠即來京請訓昨據兆惠奏俟降回
內移後即前往英噶薩爾曾諭以不必急於起程
仍在葉爾羌辦事但此時拔達克山若尚未有呈

獻逆賊確信富德等又從所駐之瓦罕移軍前駐
則英噶薩爾亦須有策應之兵方可聲息相通兆
惠即前往駐劄以壯軍威如富德酌量暫回葉爾
羌則兆惠即遵前旨來京途次辦理降回亦覺甚
便俱著傳諭知之

宣諭哈寧阿罪狀

上諭軍機大臣曰用兵為國家要務賞罰必期明允
為將軍者於一切軍務果能奮往直前身親戰陣

何事不可成就此內即稍有見識未到者朕亦必加曲諒若如雅爾哈善等在庫車圍困霍集占使伊等嚴加防守逆賊安能出走且早已竣事乃伊等並不親臨嚴飭轉似特開一路令其脫逃有此情理乎故將雅爾哈善拏問即行正法叅贊大臣乃協同將軍辦事之人將軍思慮所未及叅贊即應指陳若不見聽即應叅奏哈寧阿為雅爾哈善之叅贊解到時亦應正法但叅贊職任較將軍究

稍有間是以將伊擬斬監候揆之以理此次秋審
哈寧阿即宜予勾因念伊父哈達哈現在軍前若
有分外効力之處尚可稍從寬宥昨富德等領兵
至拔達克山交界遣使索取霍集占當遣額爾登
額時達爾黨阿哈達哈豈不宜告請前往與其遣
額爾登額何如伊等一行之為愈哉況伊等皆獲
罪之人朕加恩復用為侍衛遣往効力不但當感
激朕恩即伊自計亦當奮勉乃竟以侍衛自居與

衆為伍不知愧恥實出意料之外此等大關係處
俱未計及哈寧阿豈尚可曲宥耶但朕念費英東
扎爾固齊不忍將伊孫同衆犯棄市特加恩令哈
寧阿自盡著曉諭哈達哈及軍營大臣官兵等知
之

壬辰

諭護軍統領努三等會兵剿賊及陞賞管屯官兵
上諭軍機大臣曰努三奏稱奉到會合永貴追剿嗎

哈沁之諭旨將所有官兵厄魯特兵內揀選十二人又新降之厄魯特蒙克津等十七人率領往迎永貴俟巴里坤馬匹到日永德領所餘官兵六十餘人續行策應等語努三頗屬奮往但官兵為數無多前已諭永貴選阿克蘇兵三百名赴烏魯木齊途中遇解送軍營馬匹即揀選九百給與兵丁就近支領口糧往額林哈畢爾噶等處搜捕賊衆至永德昨欲同努三前往已允其請但烏魯木齊

乏人著仍駐劄辦事又所奏承辦屯田之遊擊金梁在軍營効力行走數年管屯二年辦理妥協等語金梁著授為叅將賞戴孔雀翎以示鼓勵著努三傳諭將來伊若更知奮勉朕必加恩優叙

訓飭喀爾喀副將軍策布登札布等追賊不力

上諭軍機大臣曰據策布登札布奏稱八月十一日行至伊犁分兵搜捕嗎哈沁派叅贊大臣齊努渾公品級多岳特領兵二百名往哈塔奇被賊盜馬

三百餘匹追回一百七十餘匹賊人選馬百餘匹
向烏哈爾里克河上遊逃去又派扎薩克敦多卜
多爾濟前往追捕齊努渾至哈什山遇見敦多卜
多爾濟前至哈什河之額爾默勒濟山嶺雪大迷
蹤等語又奏稱齊努渾等令扎哈沁公扎木禪等
追嗎哈沁賊蹤既過哈什向烏魯木齊西山應就
近聽烏魯木齊大臣奏聞候旨伊即從布勒噶齊
戈壁經過庫隴癸河由巴顏珠爾克卜倫轉回等

語所奏殊未明晰齊努渾多岳特係專派捕賊之人反被賊盜去馬匹選其臆壯者逃去僅獲賊所棄剩者而回甚屬疎懈著交部嚴加議處齊努渾人本平常因隨兆惠効力加恩賜號巴圖魯今被賊盜馬數百匹尚可謂之巴圖魯乎齊努渾著革去巴圖魯號此次若能勦賊尚可自贖否則重治其罪至齊努渾等係尋蹤追賊之人覽奏似在策布登扎布聞信遣人之後方抵哈什且策布登扎

布身為將軍一聞此信並未親身前往仍遣此等
無用之人伊從前若無効力之處必一併議處矣
著傳諭申飭現在戕害德舒之嗎哈沁深可憤恨
策布登扎布若在伊犁即行搜捕如已轉回即從
去年舍楞等往俄羅斯之路過冬以便堵截就近
支給口糧頃據成衮扎布奏因接濟口糧由巴顏
珠爾克一路解牛一千二百頭計已收到伊等勒
賊之時須訊問明白務期生得賊首奉到此旨即

行覆奏

諭參贊大臣舒赫德分隊安設卞倫

上諭軍機大臣曰舒赫德奏稱兆惠派副都統職銜
阿定保領兵五百名馬二百匹給與兩月口糧由
阿克蘇至庫車一帶尋蹤瞭望搜除隱匿賊匪請
於事竣後將官兵分為兩隊一隊在賽里木拜等
處之阿勒坦和碩要路安設卞倫一隊在阿克蘇
之穆素爾要路安設卞倫守護臺站照看往來行

走之人等語所辦甚是著阿定保等奮勉行走

諭陝甘總督楊應琚照辦酌留公費名糧

上諭軍機大臣曰楊應琚奏稱陝甘兩省酌留公費
名糧除彌補各營公私借墊銀兩外尚餘存庫銀
三十六萬八千餘兩等語從前酌定扣留此項銀
兩原以通融調劑俾帑項不致久懸而兵丁亦免
按名扣抵實為一舉兩得今自二十年辦理以來
不特借墊清還更有餘剩可見行之確有成效著

傳諭該督此時尚有應辦善後軍需酌扣公費名糧應仍照前辦章程妥協經理其存貯餘銀該督詳悉查明俟前項彌補全清將續辦解送馬匹及一切公務借墊等款并將來有無應行協濟之項一一據實具奏到日候朕酌量加恩即於此項銀兩內動撥庶以獎勵急公於軍務轉輸兵丁生計均有裨益

陝甘總督楊應琚疏奏軍營馬匹出關日期

楊應琚奏言臣查陝甘辦解軍營健馬萬匹分作三起第一起巴里坤留牧馬匹第二起河西滿漢各營朋餵馬匹第三起再將陝省各營朋餵馬匹湊解今十月初一初三等日侍衛舒常蘇勒過肅出關初七初八等日侍衛兆君柱等三員同厄魯特司轡策塔爾等到肅以後尚有續到人員但有二三員先到巴里坤舒常等即可帶領行走至內地二起馬匹已於九月十六

日出關其陝甘馬匹又隨二起之後接續前往
均可不致遲滯奏入報

聞

甲午

命副都統齊努渾等仍隨副將軍策布登扎布追賊
上諭軍機大臣曰據齊魯渾奏稱伊等同扎哈沁公
扎木禪領兵百名追賊至阿爾齊圖覓得新踪扎
木禪等先行在哈喇呼喇大山遇賊二十餘人據

守正在交戰伊等亦皆趨到共勦賊二十人有二賊步行逃去收回被盜馬九十六匹扎木禪多岳特各回游牧伊亦即轉回等語昨策布登扎布叅奏到時朕諭以齊努渾等若仍不能勦賊收馬即重治其罪今幸藉扎木禪之力得以成功伊等亦何能為齊努渾多岳特雖經勦殺賊衆仍交部議處至伊等勦賊時理應訊明係何處賊人奏內並未聲明著遇便續奏再齊努渾係策布登扎布隊

內參贊大臣今既有忝職任且參贊尚有烏爾登
著革去參贊在領隊大臣上行走同多岳特仍隨
策布登扎布領兵由去年舍楞等逃入俄羅斯之
路堵截戕害德舒之嗎哈沁來年應撤之時候旨
始回扎木禪甚屬奮勉朕已洞鑒著策布登扎布
傳旨嘉獎仍賞緞四端以示鼓勵准其即回游牧
俱著傳諭知之

命議處內閣學士清馥

上諭軍機大臣曰據清馥奏稱行至蘇爾圖烏蘭與
遣往追捕嗎哈沁之濟彥保相距三四日程途若
再為前進往返又須十餘日恐悞送馬之期即轉
回巴里坤等語清馥與濟彥保相距數日何由得
知顯係從前被賊誑誘今親往不能追捕必致獲
罪因所遣有人遂以策應為名於途間逗遛觀望
及得送馬之旨即藉口轉回殊屬取巧此與避賊
何異甚屬不堪清馥所賞孔雀翎著摘去仍交部

嚴加議處伊業已轉回即同安泰五吉等解送馬匹俱傳諭知之

乙未

命原任副都統揚桑阿前往葉爾羌照富昌例交舒赫德差遣委用

丙申

定邊將軍兆惠疏奏進兵索取逆賊情形

兆惠奏言臣前脩口糧一千石以駝八百餘隻

派總兵五福送往富德軍營今富德咨稱再遣使往拔達克山索取逆賊一面進兵揚威將喀喇庫勒存留之兵調取協助共兵四千名應接濟口糧等語臣即於英噶薩爾貯備糧內再撥五百石派遊擊訥爾吉等送往又據副都統豐訥亨報稱巡查道路惟吉雅斯一帶嶺小雪微尚可行走將來官兵凱旋應行知會現在咨詢富德回兵道路飭令訥爾吉迎往奏入

上諭軍機大臣曰昨富德奏從瓦罕一路進兵索取
逆賊曾諭兆惠往英噶薩爾策應若今歲未能竣
事富德即回至葉爾羌辦事兆惠仍遵旨來京此
次遣使索取次第進兵料拔達克山必生畏懼佇
聞凱奏以慰朕懷

命查議新疆効力武職員缺

上諭軍機大臣曰舒赫德等奏稱內地遣往新疆運
送什物官員多係外委千把未免呼應不靈請揀

選副叅遊守都司數員分發闡展哈喇沙爾庫車
阿克蘇等處差遣委用再阿克蘇葉爾羌距哈密
闡展更遠請於哈喇沙爾庫車各處額設馬駝牲
隻以備通融更換等語揀發武職事屬可行但此
等分發人員與內地之即可得缺不同若即帶內
地職銜則綠旗營缺又復壅滯現交軍機大臣酌
議著將舒赫德奏摺錄寄楊應琚查明甘肅營缺
若干揀發新疆人等作何補用未得缺時或應酌

給公費定議奏聞至闕展等處額設馬駝接濟於
運務有裨將來官兵凱旋有帶回馬匹及現在解
送駝隻分留各處以備更換及來年有無購辦分
撥俱著楊應琚籌議具奏

命查陷賊偷生之官兵等正法

上諭軍機大臣曰兆惠奏稱齊凌扎卜查出隨西安
馬甲阿本泰之間散都什格於康熙五十七年在
噶斯被掠鑲紅旗滿洲護軍費雅訥等於雍正九

年在和通呼爾哈被掠等語費雅訥都什格係滿洲世僕被賊掠去忍恥偷生及大兵進剿尚留戀妻室不行投回情罪可惡著奉到此旨即行正法將其家口充賞

諭定原駐烏魯木齊辦事滿泰等情罪

上諭軍機大臣曰安泰查審滿泰貪婪敗檢范時綬役兵漁利一案滿泰情罪確實已命於該處正法至范時綬家人郭義藉端營利伊先不知情所開

店房只用官匠一名餘皆自僱并未派出兵丁范
時綬係特差辦事之人理應潔已奉公乃營私求
利即治以重罪亦所應得但較之滿泰尚可從末
減著革職交與定長令其効力贖罪定長等原叅
全派兵丁之處亦未確實著交部察議

戊戌

申諭刑部侍郎永貴等酌定追剿嗎哈沁道路

上諭軍機大臣曰永貴奏稱奉到令伊稍待努三會

同追賊之旨隨即起程在哈喇沙爾庫車一帶相
候等語永貴前領兵至穆素爾山嶺因雪大難行
今又候努三同往伊果親至其地目覩情形何妨
改從他道所奏殊屬含混并其曾至穆素爾山嶺
與否俱未可定矣永貴宜速行札商努三將道路
酌定倘實在難行則仍遵續降諭旨由烏魯木齊
前往務期盡剿逸賊以紓衆憤

諭御前侍衛署副都統安泰等照舊解送軍營馬匹

上諭軍機大臣曰五吉等奏稱准兆惠等行文豫備
凱旋官兵口糧羊隻是軍營現在需馬無多等語
伊等以為撤兵在即則解馬一事可以從緩殊屬
非是若軍營果不需馬朕必降旨停止豈可預為
揣摩著傳諭安泰五吉等仍遵節次諭旨加意趲
解馬匹或於中途得逆賊就俘確信即駐候朕旨
再行定奪

命嚴訊庫車居住之陷賊兵丁

上諭軍機大臣曰據德文奏稱庫車有正黃旗護軍
武善保之家人常壽肅州綠旗馬兵馬祿俱於和
通呼爾哈被掠轉入回地常壽曾娶回婦生子等
語伊等前為厄魯特等略賣俱忘本之人請解送
肅州辦理等語常壽馬祿在回地二十餘年大兵
收庫車時即應據實投回乃留戀不發顯有附和
賊人情事著楊應琚嚴審具奏

恩賞署防禦茂罕巴圖魯號署驍騎校塞卜騰藍翎

上諭軍機大臣曰署防禦茂罕在軍營行走有年甚屬奮勉身被鳥鎗傷著加恩賜號呼爾察巴圖魯賞戴孔雀翎仍照例賞銀一百兩署驍騎校塞卜騰亦屬奮勉著賞戴藍翎仍賞銀五十兩各回該旗休息

己亥

諭叅贊大臣巴祿查奏署驍騎校塞卜騰功績

上諭軍機大臣曰昨努三委解賊人訥克衣之塞卜

騰經軍機處詢問據稱伊於乾隆二十三年富德
派往伊犁安設臺站有賊人七騎搶掠隨領兵擒
獲報知巴祿俱經正法等語塞卜騰既有擒賊功
績該管大臣自應奏請議叙巴祿何以未經奏及
著傳諭令其回奏

諭喀爾喀副將軍策布登扎布酌量堵賊及撤兵事
宜

上諭軍機大臣曰策布登扎布奏奉到由阿爾台轉

欽定四庫全書

平定準噶爾方略正編
卷八十

三十八

回游牧之旨擬將印務交福祿等辦理伊與車木
楚克扎布俱請入覲等語是伊等此時業已撤兵
朕昨又傳諭伊等向上年舍楞逃入俄羅斯之路
堵截逸賊或續經奉到又復前往亦未可定但伊
等若離游牧甚近即不必再行可傳諭知之

訓飭辦理招撫錯謬之內閣學士清馥

上諭軍機大臣曰清馥奏稱在楚庫爾戈壁內收服
噶勒雜特得木齊根敦等五十餘人內有斗齊之

父巴圖克勒木令其招降伊子等語辦理甚屬錯謬此次既收服根敦等多人則斗齊藏匿處所伊等皆知理應詢明領兵往捕乃遣人招降何其畏蒧之甚耶即遣人亦應留心酌量豈有即遣其父之理清馥又已被賊欺誑若果能招降斗齊則已否則重治其罪斗齊等皆誘去馬匹之狡賊即來降亦不可留除將根敦等酌挑數名前往解送馬匹外餘人俱送往肅州交楊應琚請旨又所奏濟

彥保毛庫本等圍賊數日請給以獎賞翎兵丁酌
賞銀兩等語伊等收服數十嗎哈沁何至賞翎此
皆清馥欲自見其功以掩前咎耳著傳旨申飭濟
彥保等各賞緞一端兵丁四十名各賞銀三兩俱
著清馥備辦

定邊右副將軍富德等疏奏查詢勦殺賊黨

富德等奏言臣等遵

旨將勦殺之逆黨阿布都克勒木及有名伯克等查

奏伏查七月初九日追及賊衆於阿勒楚爾捉
生詢問係阿布都克勒木親隨供明伊主被殺
又檢得回人內有一尸體胖面白鬚髯連鬚身
中數矢及刀鎗傷數處經伯克霍集斯等驗係
阿布都克勒木其為何人所殺未能確指至本
日所殺大伯克甚多謹將詢問得實者列單恭
呈

御覽其沙喇斯瑪呼斯厄魯特內無為首宰桑計節

次勦殺約三四百人被拔達克山擒送者百餘人亦行正法其中並無有名要犯奏入報

聞

定邊左副將軍成衮扎布等疏奏定議休息喀爾喀事宜

成衮扎布等奏言臣等前奏休息喀爾喀等事宜蒙

恩諭交軍機大臣議奏俱經准行仍將應賠馬駝牲

隻令臣等酌定年限臣等仰體

聖主仁恩謹擬將原奏各案應賠之項以癸未年為始照定額交納供應侍衛官員照理藩院行文定數支給其布延圖軍營俟策布登扎布轉回即將裁撤并嚴飭四部落副將軍盟長等曉示該杜薩克加意管轄所屬以期生計饒裕俱遵旨傳諭務期實力奉行奏入報

聞

平定準噶爾方略正編卷八十

欽定四庫全書

史部

平定準噶爾方略正編卷八十一至五

詳校官監察御史臣孫家賢

通政使司副使臣莫瞻菴覆勘

總校官進士臣朱鈴

校對官編修臣朱紱

謄錄監生臣劉佳瑋

欽定四庫全書

平定準噶爾方略正編卷八十一

乾隆二十四年冬十月庚子

定邊右副將軍富德等疏奏拔達克山呈獻逆賊霍集占之尸函首送京

富德等奏言臣等向拔達克山頭目素勒坦沙索取逆賊霍集占波羅泥都再行遣使前往八月二十五日據巴圖魯侍衛額爾登額遣吉林

佐領葉卜充額等稟稱聞拔達克山因鄰部欲來取二賊遂先行殺死隨於九月初九日面見素勒坦沙給與檄文賞物據稱擒獲霍集占等之後即送至柴扎卜拘禁有琿都斯部落前來索取霍集占等又欲潛通我讐國塔爾巴斯所遣之人為我擒獲因集衆公議將伊等殺戮以免後患等語額爾登額等云爾部既獲二賊不縛獻而擅殺已屬不合此時即應將首級獻出

素勒坦沙尚以經典為詞再三辯論始云我等已歸順

大皇帝但自行獻出恐衆人不服應請遣人驗實再定額爾登額等密諭從準噶爾脫出熟識二賊之右衛滿洲納達齊前往據云驗過霍集占之尸屬實其瘞埋波羅泥都之地與霍集占中隔一牆但有血跡並無尸骸又令同行回人素勒坦和卓密雜帕爾詳驗俱稱確實隨經額爾登

額驗得霍集占之尸左手有鳥鎗傷脇上鳥鎗傷直透腋下鳥鎗輕傷因詢波羅泥都尸骸據稱波羅泥都曾囑其從人云一切罪孽俱汗和卓木所為我死後不可同一處葬或移至喀什噶爾更好等語伊兄弟隨從共四十餘人內有十餘人潛逃或係將尸盜去當遣人究問遂於十三日遣其親信往柴扎卜將守尸之們多索丕等嚴審十九日據素勒坦沙告稱刑訊看

守人等實不知為何人盜去若未殺而詭稱已
死日後敗露

天朝豈能容恕隨舉回經設誓額爾登額等亦多遣
回人厄魯特等在外密訪俱稱殺死是實二十
一日巴圖魯侍衛伍岱將回人們多索丕回婦
濟爾噶勒等傳來訊問僉稱被殺又據們多索
丕告稱兩和卓未在柴扎卜原住居兩處十餘
日後有數人來將二人拘於一室三日後忽有

二百餘人圍守房屋旋有數十人突入云今來
殺汝二人遂將我等曳出良久我搶入門內見
二人俱被殺死隨從者逃出十餘人或將波羅
泥都之尸盜去等語濟爾噶勒告稱兩和卓木
被殺時我與瑪拉塔什阿琿之妻及鄂勒錐圖
索丕等三人擁擠不肯出門有執刀二人彼此
相顧一人先砍小和卓木首聯一綫其大和卓
木被砍未絕我抱持哭泣鄂勒錐圖將一人刺

倒衆人遂疊刺和卓木胸前併刺死鄂勒錐圖
將我二人曳出我等奮身直前求死瑪拉塔什
阿琿之妻遂被刺傷數處而死我被刺絕而復
甦等語薩喀勒索丕告稱兩和卓木被殺後我
將尸骸掘地埋藏當日即被傳喚到此不知為
何人盜去等語額爾登額等再四詰訊并將霍
集占首級令其識認據呢雅斯索丕哭告伊自
幼由我撫養指點額角出痘瘡痕記識甚確因

將霍集占首級及親見殺死波羅泥都之人令其於二十二日起程將此先行報知三十日額爾登額等到營臣等與領隊大臣侍衛官員及伯克霍集斯摩羅郭波和卓布魯特阿奇木令其識認俱云詳看首級視生前雖覺稍變但面龐可識其髮際右太陽瘡痕鬚角及唇頰微鬚實係霍集占首級無疑臣等諭來使端伯克云爾等不將逆賊縛獻又不候使人到日遽行殺

死而波羅泥都尸骸亦未尋獲况前差侍衛薩
穆坦自爾部起程次日爾部遣人追告霍集占
因傷身死今又云與波羅泥都同時被殺前後
互異顯係藏匿波羅泥都但將霍集占尸身送
出據稱我等全部皆投誠

大皇帝欲安生業故將二賊擒獲但鄰部俱來索取
若縱之他往必會兵報讐前此拘禁時傳聞霍
集占傷重身死及遣人往驗尚存薩穆坦行後

琿都斯即領衆五千勒取二人因決計殺死以絕其望但我部不知罪人之尸關係甚重以致看守不嚴深為悔恨此次遣使起程素勒坦沙即領兵二千往禦琿都斯之衆若波羅泥都未死或縱其逃去豈能保無敗露等語臣等又詳訊們多索丕等回人俱供係撫養二賊及隨從多年之人親見被殺與額爾登額所報相同查蘇朱克圖之妻濟爾噶勒係獎賞孔雀翎布魯

特阿奇木之姊薩喀勒索丕之妻係公鄂對姪
三等侍衛阿卜都爾滿之姊伊等現在軍營因
令其密行訪問亦稱所言屬實臣等伏思逆賊
霍集占波羅泥都蒙

聖主繼絕舉廢生死肉骨之仁乃敢悍然反噬傷害
使臣抗拒大兵種種逆惡擢髮難數今年閏六
月臣等奉

命三路進剿逆酋聞風潛遁全部乞降臣等輕騎追

襲仰藉

威福屢摧賊衆陣斬二千餘人收降一萬四千餘口
賊勢窮蹙逃入拔達克山臣等以利害曉其酋
長二賊遂被拘繫卒就誅戮函首獻款恭順有
加此皆我

皇上神謨睿慮纘承

聖祖

世宗綏靖遐荒之不緒自用兵以來平定準噶爾全部

左右哈薩克東西布魯特塔什罕安集延烏梁
海諸部先後內附今又平定回部殲厥渠魁收
降拔達克山部落十萬戶博洛爾部落三萬餘
戶闢地數萬里請為臣僕者數十部五載之間
建此偉績考之自古帝王未有若斯之神速者
臣等職在戎行幸宣敵愾尤不勝懽欣踴躍謹
遣

乾清門二等侍衛噶畢雅圖巴圖魯額爾登額等

將逆賊霍集占首級函送京師并將親見殺死
波羅泥都之們多索丕等及拔達克山素勒坦
沙來使額穆爾伯克送京臣等即領官兵於十
月初二日回葉爾羌欽遵前奉

諭旨將舊派兵丁分起撤回新派兵丁酌留鎮守俟
至日另行詳議具奏敬書露布由驛馳遞奏入
上諭軍機大臣曰富德等奏報拔達克山素勒坦沙
全部歸誠呈獻逆賊霍集占首級從前兆惠富德

等撫定葉爾羌喀什噶爾等城時朕即諭以速追
逆賊為要迨富德等勒兵向拔達克山索取又諭
以理應速入追擒今二賊伏誅情事確實則伊等
雖未能生擒俘獻而勞績殊堪嘉悅兆惠富德明
瑞阿里衮舒赫德及軍營大臣官兵俱分別加恩
宣諭中外軍務告竣兆惠富德等即遵旨來京商
辦善後事宜大臣官員等亦著分起前來至伯克
霍集斯入覲時將應行入覲之伯克等酌派數人

同來勿令生疑各隊兵丁若係十九年二十年派出者即撤回各該處其餘兵丁酌派駐防聞副都統由屯患病若尚未全愈仍令其加意調養不必亟行前因舒赫德一人駐劄葉爾羌曾諭阿里衮一同辦事但喀什噶爾尚未有駐劄大臣或令阿里衮前往著舒赫德等酌議具奏伊等仍於領隊大臣侍衛內酌留二三人以備差遣再富德等奏波羅泥都身尸未獲回人等有盜往喀什噶爾之

語今將逃走之逆賊親隨等十五名傳諭阿里衮等留心查獲併身尸送京其富德所送隨從逆賊之回婦內有布魯特阿奇木及鄂對姪阿卜都爾璫之姊俱著交付伊等仍將軫念勞績加恩賞給之處曉示其烏沙克伯德爾格等降人俱酌量安插及移送肅州分賞官兵前諭策布登扎布於舍楞投入俄羅斯一路駐兵堵截今逆賊授首著即回游牧弩三永貴不必追勦嗎哈沁戕害德舒之

賊著舒赫德於來春派兵數百名搜捕務獲五吉
清馥亦遵前旨將所解馬匹於中途聞信後擇地
收放候旨安泰蘇勒亦著回京舒常可往省伊父
再行轉回額敏和卓玉素富俱著勞績此時若同
來則回部經理乏人額敏和卓著加恩晉封郡王
同舒赫德駐劄辦事玉素富著加恩賞給郡王品
級來京請訓後回游牧休息俟更換額敏和卓時
前往此次紅旗奏捷甚為迅速著加恩將經過各

臺站交該管大臣詳查造冊送部議敘併將大功
告成傳諭章嘉胡土克圖及駐藏大臣俾衛藏及
阿里拉達克等處知之

賜拔達克山素勒坦沙

勅書

奉

天承運

皇帝勅諭拔達克山素勒坦沙將軍富德等奏爾擒

獲逆賊霍集占波羅泥都因鄰部生心俱行殺戮
遣使請驗逆尸函首以獻全部歸降願為臣僕恭
順之忱深用嘉悅俟爾使至京自必優加賞賚茲
以降勅賜爾蟒緞四端其爾處所拘之阿卜都海
里鄂斯璊俱受逆賊信任附和為惡將軍大臣等
奏請諭爾縛獻朕念伊等尚非霍集占之負恩反
噬可比爾等若以業經誓約乞其餘生朕亦加恩
賞給但此二人在葉爾羌喀什噶爾諸回人中頗

著名字爾游牧相近當嚴行約束毋俾潛逃生事
致有乖誠惻爾與所屬其善自為計以永荷將來
之恩澤特諭

以平定回部

宣諭中外

上諭大學士曰將軍富德等奏報拔達克山素勒坦
沙奉檄拘禁逆賊霍集占等於柴扎卜嗣因霍集
占欲與琿都斯等部落暗行攻襲當將霍集占波

羅泥都勦殺呈獻霍集占首級并看守逆尸人等
隨經驗看明確馳送京師等語前此大兵平定準
噶爾各部悉入版圖而東西布魯特左右哈薩克
無不傾心向化獨逆首霍集占兄弟辜恩反噬不
得不興師問罪雖葉爾羌喀什噶爾等城以次撫
降設官定賦將就歲事而充渠一日不獲則軍務
一日不竣是以旁午軍書焦勞籌畫並非好為窮
兵黷武之舉自將軍兆惠富德等勵衆選兵先後

追勦屢獲全勝賊勢愈蹙安集延與拔達克山諸
部共知感仰恩威歸誠恐後今既奉檄自効逆酋
授首從此邊陲寧謐各部落永慶安全露布遠聞
此皆仰荷

上蒼福祐

宗社鴻庥俾朕得纘

皇祖

皇考未竟之丕緒惟益勵持盈保泰之心夙夜倍切永

兢此意當與中外臣民共之茲當殊勲克奏茂典
應修

郊

廟告功益申昭報時當長至朕方躬祀

園丘其勅所司敬舉受釐宣捷之忱載諸祝冊用申懇
款恭惟盛京

三陵禮應親謁叩謝但以序屆冬寒恐勤屬車之衆特
遣親王前往恭代

東陵

西陵卽擬親赴展謁而計程往返適屆

慈寧萬壽慶辰敬以明年獻歲諏日親詣行禮然終不足
以抒積悃擬告祭

太廟之日朕親行展事至

方澤

社稷照例遣親王恭代冬至次日朕恭詣

皇太后宮行禮亦於表文內增撰武成慶語其御殿頒

詔諸儀一併舉行既以循令節而返崇禧即以慰
慈懷而布溥惠其餘一切典禮各該衙門察例舉行將
軍等凱旋至京時朕當親臨郊勞念我大臣官弁
等敵愾奏功勛施懋著酬庸論賞應備恩榮將軍
兆惠已晉公階并迭賜章服其加賞宗室公品級
鞍轡以示寵異將軍富德著晉封侯爵并賞戴雙
眼翎兆惠富德再著加授一子為三等侍衛叅贊
公明瑞公阿里衮并賞戴雙眼翎舒赫德及在事

大臣官員均交部從優議敘兵丁之在行陣者賞給兩月錢糧其葉爾羌等城兵丁并賞錢糧一月受著策勛之令典益昭綏遠之鴻猷將此通諭知之

命陞賞霍斯庫魯克勦賊有功官兵

上諭軍機大臣曰前據明瑞奏敘勦賊於霍斯庫魯克之奮勉有功官兵等應加恩陞賞以酬勞績乾清門二等侍衛什爾瑪海巴圖魯德爾森保著授

為頭等侍衛三等侍衛哈朗圭巴圖魯塔瑪鼎三等侍衛滿柱俱授為二等侍衛二等侍衛莽喀察額爾克巴圖魯海蘭察俱授為頭等侍衛藍翎侍衛肯特克巴圖魯羅托著授為三等侍衛打牲叅領什爾瑪海巴圖魯獎賞孔雀翎滿濟勒圖著授為總管佐領齊爾瑪海巴圖魯獎賞孔雀翎哲野勒圖著授為叅領驍騎校獎賞藍翎立格署防禦驍騎校獎賞孔雀翎卓楞德衣驍騎校烏納哈俱

著授為防禦馬甲獎賞藍翎賚布哈伊特格勒圖
巴圖魯領催獎賞藍翎穆庫楚白都訥獎賞藍翎
領催納喇善吉林領催堪泰俱授為驍騎校獎賞
藍翎前鋒遜塔著授為護軍校打牲馬甲察罕泰
八十九額勒圖呼爾厄魯特馬甲們都伯勒克俱
授為領催鑲白旗滿洲護軍校署章京常青著授
為副護軍叅領副護軍校富明鑲黃旗滿洲藍翎
長富昆鑲白旗滿洲前鋒烏爾泰鑲黃旗滿洲前

鋒九十俱著授為護軍校此內莽喀察等奮勉陷陣援出官兵應格外加恩莽喀察著賜號丹巴巴圖魯立格賜號特古爾德爾巴圖魯卓楞德賜號特古斯巴圖魯額勒圖呼爾賜號哈叻巴圖魯們都伯勒克賜號卓里克圖巴圖魯九十賜號庫魯巴圖魯各賞銀一百兩

命額駙色布騰巴爾珠爾等管理大閱事務

上諭軍機大臣曰拔達克山遣使入覲應大閱八旗

官兵俾知天朝武備此時預為操演方覺嫻熟著
派色布騰巴爾珠爾扎拉豐阿管理

定邊右副將軍富德等疏奏招服博洛爾部落
富德等奏言臣等前於葉爾羌收獲回人愛達
爾伯克詢知伊係博洛爾部落有三萬戶與拔
達克山接壤因與霍集斯商議繕給托霍斯肯
之伯克伊斯邁拉和卓獎賞藍翎敦多卜等印
文於九月初三日前往招撫今據博洛爾頭目

沙和碩默特遣使該畢伯克等前往軍營據伊
斯邁拉和卓等告稱行至沙和碩默特所居十
里外即遣人迎接次日相見沙和碩默特敬奉
印文譯看訖戴於帽頂十七日筵宴使人以歸
附奏章付該畢等起程并云拔達克山若不獻
出霍集占等我即選衆隨征情詞甚為恭順臣
等加以撫慰十月初一日同拔達克山使人一
體筵宴交額爾登額等伴送來京謹將該部落

奏章臣等文檄一併恭呈

御覽奏入報

聞

辛丑

諭定邊將軍兆惠等辦理伯克霍集斯等來京

上諭軍機大臣曰昨諭兆惠富德等與霍集斯偕來
并將應行入覲回人一同行走使之不疑今大功
告成霍集斯不無覬覦率同入覲更宜慎之又慎

方合事機伊若以往和闐或烏什整裝為詞即婉
言勸阻令其派出親信前往若求兆惠等同去更
屬不可霍集斯起程後舒赫德即將伊子漠咱吧
爾及其家屬盡行整裝送京至回地既無滋事之
人則將來仍於伊犁駐兵以休息各城回衆惟令
其輸納貢賦一應善後事宜伊等即會商妥議具
奏

以用兵準噶爾始末

宣諭諸王大臣

上諭諸王大臣曰拔達克山素勒坦沙等歸誠逆賊
霍集占授首於辦理回部固告成功而平定準噶
爾全局亦於此大定昨已降旨宣諭中外王大臣
等躬逢國家景運昌隆殊勲捷奏當與朕同心感
慶敬迓

天庥而朕於班師奏凱時迴念前事轉深祇懼非僅為
履滿思謙之虛語也準噶爾一部久外生成自我

皇祖

皇考時屢申撻伐未既厥緒前都爾伯特策凌策凌烏
巴什等方款關內附在庸庸無識之徒生際升平
日久方皆狃於便安謂可拒而不納殊不思堂堂
天朝撫馭方夏如達瓦齊之蠢然一物縛致京師
以降王恭養數載亦朝臣所共見者豈有儼然視
如敵國至不敢受其降人之理然彼時朕以任事
之人尚未即決策興師也厥後阿睦爾撒納等各

部來降者叩關踵接實繁有徒於義固有難辭而處之邊隅又足為喀爾喀貽患勢不得不經理游牧返之故地且

上蒼錫祚垂禧予以經畫邊陲之事俾朕繼述我

祖宗未竟之志事而朕敢惑於浮議不勉思敬以承之乎今統計用兵不越五載內地初不知有徵發之勞而關門以西萬有餘里悉入版圖如左右哈薩克東西布魯特及回部各城以次撫定現在拔達

克山諸部落皆知獻俘自効捧檄前驅以亘古不通中國之地悉為我大清臣僕稽之往牒實為未有之盛事即朕始願亦不敢望其遂能至此也人情可與樂成難與慮始在久安長治之餘亦勢所必有然憂盛危明正當動色交儆此番遐方綏靖我將軍叅贊以及一介執戈之士無不得嫺行陣於國氣人才深有裨益然非朕力為振作信賞必罰以淬勵之其誰不畏難苟安而坐希無事之福

乎今即飲至告功而日有萬幾宵旰疇咨又何能
自釋敬事之懷有一日之可逸者即前此軍務方
殷運籌乙夜曾不廢令節燕饗之文憂愁二字朕
惟於望雨憫農用之於軍務亦未至於憂愁困苦
如衆人之所畏者茲雖大功告成亦惟永懷圖易
思艱以為昭受凝承之本又豈可恣意求逸耶然
如去冬兆惠深入回地猝爾被遮設非朕先時各
路派兵運饌在道何由集事神速便若轉圜此一

節朕不自謂洞燭先幾而深荷

天地

祖宗眷祐默牖朕衷實愜於懷於此益信

天人感應之符捷如影響而欽承

景命我君臣當益交勉之軍營在事諸臣昨已加恩優

敘至同朕辦理軍務者惟大學士傅恒與朕一心

日夜不懈前因伊犁平定賜加雙公曾涕泣固辭

今伊子傅靈安尚非披堅執銳之歲而即能奮勇

行陣屢著勤勞實愜朕望著賞給傳靈安頭等待
衛以著酬庸之典大學士來保年近八十行走不
懈及諸軍機大臣官員日夜隨侍候報抄錄一切
均著勤勞大學士傅恒來保及軍機大臣并軍機
處行走官員著交部一併議敘仍將此旨通行曉
諭知之

壬寅

諸王大臣請加上

尊號

上不允復

諭曰諸王大臣等以拔達克山素勒坦沙投誠逆賊
霍集占授首準噶爾全局大定具表奏賀并請加
上尊號雖援据典章而朕功成祇懼彌切於懷豈
肯崇尚虛文勉從所請西陲一事仰賴

上蒼福祐

宗社鴻庥殊勲速奏隸版籍者二萬餘里治軍書者不

及五年載籍以來實罕有倫比而朕所深用愜心者乃不在遠圖之式廓而在

先烈之克成欽惟

皇考付畀朕躬夙夜勉圖繼述矧在早年備承

皇祖眷顧攸隆每遇軍國重務即令面聆

聖訓籌畫是朕躬之仔肩倍重而纘緒者亦倍艱今以數載間運籌決策之勞克全我

兩朝撻伐綏遐之略返衷自問差可無負

燕貽者當在於是故非好大喜功之為見也我

皇祖聖德神功超越萬古戡定殊勲炳於史冊廷臣請

上

尊號尚未允行乃者闕門以西迄乎大漠雖通亘古未
通之境究以國家全盛餘力及之視當年之事會
稍需刻難中輟者其緩急輕重固不可同年語矣
然方其罪人未得朕斷不因盈廷畏憚輒事苟安
若逆渠既獻馘告功則國法用申而軍威自無可

極是以富德捷奏尚請追索鄂斯璫阿卜都海里
二人以絕根株朕以成事已歲即傳諭飭止之固
不能惑於築室之謀亦豈或蹈夫佳兵之戒所謂
行乎不得不行止乎其所當止無成心也茲功成
事定惟欽遵

祖宗之成法益深兢業耳所有王大臣等加上尊號之
請不必行敬惟辛巳歲恭逢

聖母皇太后七十萬壽慶辰鉅典鴻儀舉行伊邇茲以

庸功既奏上慰

慈懷已於長至節宣表稱賀推

恩展禮稠疊便著其崇上

徽稱宜以普天

大慶時敬謹恭擬再行奏請

懿旨諸王大臣其明體朕意

臣等謹案平回之役初由戡定準噶爾部所
連及而核其始終本末則西師歲成全局繫

馬方二酋偕德鵠張滅亡固其自速然當勢窮鉅險三遇

王師躡踪摧陷猶冀竄身同教授据經典不即縛獻為辭遊魂暫資假息我

皇上神謨遠燭

預勅將軍等統兵壓境必以罪人斯得為期是以拔達克山懷

德畏

威不獨函馘繫俘計不旋踵而諸部之聞風內附者
且遠近環球相屬於是分屯勸墾定賦贍軍
回地日開而伊犁疆索所臻益助金湯之鞏
矣設令二酋乘釋縲還巢之後安居故土反
噬不生是猶四衛喇特或沿初制世封部長
日久保無并吞滋釁勤我遠圖蓋惟

天心誕畀純禧故投會迎機事獲一勞而永逸亦惟
廟算先幾決策故隨宜定變功歸一舉而兼收而

聖德淵冲尤兢兢以保泰持盈為亟惟

天

祖錫祚貽庥之厚澤卻臣民崇上

尊號之彌文於以勵明作而儆宴安綿億萬世善建
不拔之丕基皆於是乎在又宣隆古史書後

陳景燦所能導揚

盛美者哉

諭定邊將軍兆惠等會商牧放馬匹

上諭軍機大臣曰楊應琚奏稱現在大功告成撤兵在即除第一起馬五千匹照常解送以資官兵更換乘騎其二起三起則酌量存留備調及撥補各營缺額等語解送軍營馬匹若已足用即如該督所議分別辦理或內地採買草豆未免拮据而沿途不堪繁費即送往巴里坤擇水草牧放以備伊犁等處駐兵屯田搜捕嗎哈沁之用今該督已奏報起程出關應與兆惠舒赫德等相遇自當相度

情形妥協商辦一面具奏俱著傳諭知之

癸卯

諭定邊將軍兆惠等酌議駐兵屯田事宜

上諭軍機大臣曰舒赫德奏稱駐防伊犁應派出滿洲索倫兵四千名建築城堡亦派綠旗兵四千名所需口糧由水路造船運送第一年派回人三千戶前往屯田或馬匹或牛驢亦購辦二三千豫備調用等語伊犁駐兵屯田一事原議以來年為始

由近及遠若一時齊集滿漢兵丁及回人踰萬殊
覺張皇頗露作難之意豈謂若此遂可停其辦理
乎伊從前與成衮扎布同勦厄魯特時拘泥招降
之策將沙喇斯瑪呼斯等疎脫以致投入逆回抗
拒大兵伊係効力贖罪之人因在阿克蘇辦事頗
屬盡心故加恩復用看來舊習全未悛改著傳旨
申飭至於屯田伊始或派兵五百名防守回人五
百戶耕作計所獲之糧足敷食用再議開擴其原

議駐防官兵四千名亦擬分駐葉爾羌喀什噶爾
阿克蘇等城就回人交納糧石以資養贍况回部
不便久駐我兵前此亦曾諭及舒赫德既如此陳
奏著傳諭兆惠富德楊應琚等詳悉妥議具奏
命撤噶斯等處卡倫

上諭軍機大臣曰從前副都統多爾濟奏請裁撤由
西寧之噶斯通伊犁之德卜特爾等處二十三卡
倫彼時因逆賊等尚在逋逃稍為留待今天功既

成著將前項卡倫即行撤回一切遵照原議辦理
以舉行筵宴典禮

命傳諭定邊左副將軍成袞扎布等

上諭軍機大臣曰平定回部大功告成北路將軍大
臣等同此懽慶可傳諭成袞扎布等宣示喀爾喀
四部落及都爾伯特部落知悉策布登扎布即計
程於十二月二十前後抵京同赴太平嘉宴阿拉
善王羅卜藏多爾濟等從戎頗著勞績亦著傳諭

所部并率軍前効力已經出痘之人來京筵宴

命四川湖廣等處協濟甘肅錢文

上諭大學士曰前因甘省錢價昂貴傳諭四川湖廣
各督撫於局鑄餘錢內酌撥協濟現在大兵凱旋
及一應屯田事務民間日用錢文在所必需著於
四川省每年協濟錢十二萬貫湖廣省每年協濟
錢八萬貫按數分起解甘濟用其所需工本物料
價值以及水陸運費各該省俱作正項報銷毋庸

甘省歸還以示體恤其甘省易錢銀兩並著照數
報部撥餉該部即遵諭速行

甲辰

命分別安插收服之嗎哈沁等

上諭軍機大臣曰清馥奏稱伊在楚庫爾戈壁內收
服厄魯特根敦等男婦五十三名口內根敦等四
人請留巴里坤作為嚮導餘人交安西提督歸入
綠旗兵缺等語綠旗兵餉原以養贍內地之人此

等嗎哈沁性習叵測不但占內地額缺且乘間脫逃又滋事端著傳諭清馥將人誠實行走出力者酌量挑補數名餘俱送往肅州賞官兵為奴并傳諭楊應琚知之

乙巳

命以官犯達什朗等緩決情由曉示軍營官兵

上諭軍機大臣曰此次勾決人犯將達什朗龔宜謙緩決特以上年庫車僨事皆雅爾哈善之罪此等

微末官員不過聽其指使因將軍辦理不善致獲
罪戾若雅爾哈善等果於軍務妥協辦理而伊等
不能遵奉則一經叅奏早已在軍營正法以昭炯
戒尚何待解送京師質訊耶朕辦理一切庶務惟
以大公至正為懷毫無偏曲著將此二犯緩決情
由傳諭軍營官兵知之

命議處內閣學士清馥

上諭軍機大臣曰清馥奏稱奉到訓飭諭旨即領兵

七十名往追嗎哈沁等語清馥係領兵追賊之人
既知踪跡所在即應親身前往乃諉之官兵是以
降旨申飭伊得旨後不過以十數人趲行會合前
遣官兵儘可勦捕逸賊何必又派多兵其意特在
自衛耳伊即往追嗎哈沁等不返復何足惜而我
兵七十人徒勞往還乃專為保護伊身之用甚屬
不堪清馥著交部嚴加議處此次辦給官兵之馬
駝牲隻口糧俱著落清馥賠補

諭護軍統領努三等搜捕嗎哈沁事宜

上諭軍機大臣曰努三奏稱阿勒坦和碩嶺在穆素爾額林哈畢爾噶兩山梁之間夏令尚有積雪此時更不可行走惟伊犁河源路通哈什空格斯和洛台等山野獸頗多賊衆或於此藏匿請與永貴合兵搜捕等語所見甚是但永貴似未至穆素爾嶺果如前奏何未見知會努三此時伊等應已合兵一處若能擒賊固善否則遵旨回京交舒赫德

派出領隊大臣侍衛等酌量領兵搜捕努三所帶
厄魯特嚮導數人若効力屬實亦著同來併傳諭
舒赫德知之

丙午

諭定邊將軍兆惠等解送降回酌量安插分賞

上諭軍機大臣曰兆惠奏稱齊凌扎卜解到回人內
係逆賊迫脅之各城回衆俱安插吐魯番其伊犁
塔里雅沁伯德爾格烏沙克等衆送往肅州照厄

魯特之例辦理等語兆惠具奏時似尚未聞逆賊
伏誅之信蓋霍集占一日未獲則此等回人仍懷
叵測今大功告成自可從寬免死前已屢降諭旨
仍著送至肅州分賞官兵其葉爾羌等城回衆亦
不必安插吐魯番即順便留於各該處若係葉爾
羌喀什噶爾回人如已過該處亦不必復回即分
派庫車沙雅爾賽里木吐魯番等處安插此數年
來各城未免地廣人稀令其耕種亦甚有益著速

傳知齊凌扎卜等遵照辦理併諭兆惠舒赫德知之又

諭曰齊凌扎卜所解烏沙克伯德爾格塔里雅沁等回衆已諭送至肅州分賞官兵但伊等素染惡習今雖從寬免死仍須嚴加防範著傳諭楊應琚吳達善分賞此等回人時必離其黨羽每一處以十人為率不可過多楊應琚業經起程出關吳達善即遵照辦理

命議敘勦殺布魯特賊衆之大臣官兵等

上諭軍機大臣曰兆惠等奏稱副都統豐訥亨前往
安設臺站至額格爾呼爾瑞哨探之厄魯特驍騎
校伊薩瑪里見賊踪跡同布魯特嚮導雅克什擒
獲一賊雅克什又招降結寨賊衆幾中烏鎗豐訥
亨續到勦殺二十餘賊等語豐訥亨辦理臺站即
能勦賊殊屬奮勉著交部議敘伊薩瑪里雅克什
俱授為藍翎侍衛其隨往効力官兵俱著造冊送

部議敘

命叅將王玉廷等補授固原副將等缺

上諭軍機大臣曰兆惠奏稱陝西固原所屬之博羅營副將莫倫岱病故軍營應陞副將者惟王玉廷一人其遊擊內之富廉巴顏弼請俟叅將缺出陞補等語王玉廷富廉巴顏弼上年庫車攻戰得傷頗著勞績著加恩將莫倫岱員缺以王玉廷補授所遺叅將員缺即著富廉補授巴顏弼著記名遇

有叅將缺出即行陞補

命解送從安集延脫出之原任護軍達林來京

上諭軍機大臣曰兆惠奏正紅旗滿洲護軍達林於

雍正七年被掠轉入安集延近聞大兵進勦兩次

潛行得脫來至英噶薩爾伊並未薙辮且聞信即

行脫回本心尚未盡泯請旨安插等語達林著解

送來京候旨

平定準噶爾方略正編卷八十一